

«Tgi envida la flomma da nies lungatg?»

DA BARTOLOME TSCHARNER/FMR

■ **Ad Andeer è sa scuntrads ina quarantina da commembers da la SRG.R per salvar lur radunanza annuala. Quella è vegnida onurada cun la preschientscha Jean-Michel Cina e Gilles Marchand, e dal minister da la cultura grischuna Jon Domenic Parolini.** «Tgi envida la flomma da nies lungatg?» ha *Mario Paccioli* dumandà a chantond e sunond da maniera brillanta ed animond ils preschents en sala polivalenta d'Andeer. Pertge persunas che s'engaschan per il rumantsch paran da vegnir adina pli stgarsas en las regiuns, ma betg uschia tar la SSR.R ch'è buna da chattar glied engaschada. Il parsura *Vincent Augustin* ha er dastgà constatar l'interess per la SSG.R da la vart naziunala beneventond la gronda delegaziun da la direziun generala da la SRG SSR manada dal president e directur menziunads ed in'entira squadra direziunala sco *Bakel Walden*, *Beat Schneider* e *Maurus Dosch* sco er *Andreas Schäfer* president da la SRG.D.

Stritgar 10 piazzas

En sias expectoraziuns generalas ha Augustin tematisà ils problems che l'onn da corona chaschunia, engrevgiond la situaziun da las medias cun dramaticas sperditas finanzials. Uschia haja er RTR da spargnar 1,5 milliuns francs e saja sfurzada da prender mesiras ed adattar la puschida ed il personal, stritgond 10 piazzas da lavur.

Il concept da program 20/21 da RTR prevesia perquai da s'avischinar anc pli fitg a l'auditori ed integrar quel activamain en il program. «Perquai essan nus en mirve-



Vincent Augustin ha surdà il premi SRG.R 2020 a Tarcisi Hendry per ses meritis en favur da l'Archiv cultural da Tujetsch, en preschientscha dal laudatur Ursus Brunold (da san.).

MAD

glias, tge modificaziuns ch'il nov directur da RTR, *Nicolas Pernet*, vegn a far pertutgant l'integraziun dal public en il program», di Augustin. Avant las fatschentas statutaras ha purschi il parsura d'Andeer, *Hans-Andrea Fontana*, il bainvegni per tudestg. «Ma quai na signifitga betg, che nus n'ans engaschian betg per il rumantsch», sincerescha Fontana.

Cun creativitat tras la crisi

Il cusseglier guvernativ *Jon Domenic Parolini* è sa mussà persvas, ch'er en temps da crisi saja pussibel ch'i sa sviluppan novas forzas e novs talents che daventian anc pli creativs e vegnan da mobilisar energias zuppadas. «Tant la SRG sco er la SRG.R han demussà ch'els èn buns da dominar la

situaziun da crisi. Els han mussà ina gronda creativitat ed han chattà bunas soluziuns per accumplir lur incumbensa.»

Sin nivel chantunal è la regenza er confrontada cun dumondas da sustegn per mezs da massa. Quest basegn vegn actualmain analisà da las Scolas autas dal Grischun e da Son Gagl. «Impurtant èsi ch'i na vegnian betg cementadas estructuras, senza resguardar il midament dals consumers», pretenda Parolini che beneventa ils svilup che RTR fetschia envers la digitalisaziun. «RTR ha la funcziun d'infurmaziun e trategniment, ma er da trasportar tut las valurs culturalas per mantegnair e promover il rumantsch. Quai è la «raison d'être» per avair la SRG.R», giustifitgond er la struttura decentrala da RTR.

Mesiras da spargn cun perspectivas

Avant il pled da *Jean-Michel Cina*, president da SSG SSR, è vegnì fatg bun il rapport annual dal parsura ed il rendaint, constatond che la situaziun finziala saja anc detg equilibrada.

Jean-Michel Cina, president dad SRG SSR ha engrazià al directur da RTR *Pius Paulin* per ses engaschament. Er el ha tematisà las mesiras da spargn e ditg: «Las mesiras da spargn èn mesiras cun perspectivas ch'èn colliadas cun ina restructuraziun che garantescha ina plivalur per tut las regiuns linguisticas.»

Il directur general *Gilles Marchand* ha punctuà il success da SRG cuntanschì gist durant il temp da corona, remargond er el las grondas sfidas dal mena-

schi, ch'occupescha var 7000 persunas, entras perder ils ultims trais onns var 100 milliuns entradas da la reclama, u 12 pertschient dal budget. Ma l'incumbensa da prestaziun saja restada la medema. «Nus vivain actualmain ina revoluziun totala da las medias ed ils consumers n'èn betg pronts da desister da prestaziuns». La sperdita finziala na saja betga be impurtant ord il punct da vista economic, mabagn er cultural, perdend daners necessaris per promover la cultura svizra.

Suenter quellas novas pauc encurachantas è la radunanza sa deditgada da l'avegnir cun las tschernas, cumplettond la suprastanza cun *Roger Tuor* ed *Elena Luzzio*. Nova parsura dal cussegl dal public daventa *Carmen Dedual*.

Fertant che *Pius Paulin* ha prendì cumià sco directur ad interim da RTR, è sa preschentà a la radunanza *Nicolas Pernet* sco ses successur ch'è persvas che RTR possia dominar la sfidas futuras.

Il punct culminant da la radunanza è stada la distincziun da *Tarcisi Hendry* cun il premi SRG.R per ses engaschament da passa 40 onns en favur da l'archiv cultural da Tujetsch ch'el aveva inizià. Hendry è sa mussà satisfatg che l'exempel tuatschin da rimnar documenta privata en in archiv cultural saja dentant vegnì suandà en autras regiuns grischunas.

A la fin da la radunanza ha *Telgia Juon* preschentà il project da la «Tgea digl tgant» da Maton che vul daventar in center per la chanzun rumantscha – che Mario Paccioli ha celebrà da maniera impressiunanta.